


**БАЙГУУЛАМЖ /ЦЭГ/-ИЙН ХАШАА, ЦЭГИЙН  
ТОНОГ ТӨХӨӨРӨМЖ**

1. Хамгаалах байгууламж /цэг/ байрлаж байгаа дэвсгэр газар нь мод, өргөст тор буюу бусад зүйлээр хийсэн хамгаалалтын дан буюу давхар хашаатай байна.

Байгууламж /цэг/ /тэсрэх бодис, галт хэрэглэл, шатахууны агуулах/-ын дэвсгэр газар нь 2м-ээс багагүй өндөртэй давхар хашаа /тор/-тай байх бөгөөд тэдгээрийн хоорондын зай нь газар орны нөхцөлөөс хамааран 10м түүнээс илүү байж болно. Хашааны хооронд цагийн манаач явах зам, хашааны гадна талд 5м-ээс багагүй өргөнтэй мөр шалгах зурвас байгуулж болно.

Хамгаалах байгууламж /цэг/-ийн дөхөц газрыг хянахад тохиромжтой болгож хашааны хооронд /гадна талын хашааны дэргэд / холбоо, дохиолол, гэрэлтүүлгийн хэрэгсэлтэй хянах цамхгуд байгуулж болно.



ЗХЖШ /ХХЕГ, ОБЕГ/-ын дарга, ДЦ-ийн командлагчийн шийдвэрээр улсын онц чухал байгууламж /цэг/-д сум үл нэвтрэх хаалт, аянга зайлуулагч бүхий хянах багаж байрлуулсан инженерийн тусгай төхөөрөмж байгуулж болно.

Хамгаалах объектын дөхөц газар болон түүний орчин дахь зам дээр өдөр шөнийн цагт сайн харагдах **"НЭВТРЭХИЙГ ХОРИГЛОНО!, ЗАМ ХААЛТТАЙ"** гэсэн тод бичигтэй анхааруулах тэмдэг тавина. Тойрон өнгөрөх чигийг сумаар заана. Энэ тэмдгийг объектын хашааны тодорхой цэгт тавьж болно.

2. Ангийн гадна байгаа объектын эргэн тойронд гаднын хүн нэвтрэхийг хориглосон бүсийг нутгийн захиргааны байгууллагатай тохиролцон тогтоож болно.

Энэ бүсийн зааг дээр **"ХОРИОТОЙ БҮС!, НЭВТРЭХИЙГ ХОРИГЛОНО!, ЗАМ ХААЛТТАЙ"** гэсэн монгол, англи, орос, хятад хэлээр бичсэн анхааруулах тэмдэг тавина. Цэргийн хүрээний дарга /ангийн захирагч, объектын дарга/ хориотой бүс тогтоосон тухай ойролцоо оршин суугаа хүн амд цаг тухайд нь нутгийн захиргааны байгууллагаар дамжуулан мэдэгдэх үүрэгтэй. Хориотой

бүсэд нийтээр зорчих зам, тэмдэг тавина. Тойрон өнгөрөх чигийг сумаар заана. Энэ тэмдгийг байгууламж /цэг/-ийн хашааны тодорхой цэгт тавьж болно.

Цэргийн хүрээний дарга /ангийн захирагч/ хориотой бүс тогтоосон тухай оршин суугаа хүн амд нутгийн захиргааны байгууллагаар дамжуулан мэдэгдэх үүрэгтэй. Хориотой бүсэд нийтээр зорчих зам, сууцны болон албаны барилга, байгууламж, гадны байгууллагын эдэлбэр газрыг оруулж болохгүй.

Хориотой бүсэд нэвтрэх замыг шуудуугаар хааж болно.

3. Харуулын цэгийн дэвсгэр газар нь цагийн манаачаас аль болох хол зайд /50м-ээс доошгүй/ эргэн тойрон хяналт хийх /буудах/ бололцоог хангагдсан байна. Эргэн тойрны бут, сондуулыг цэвэрлэж, модыг сийрэгжүүлж, түүний доод мөчрийг 2.5м хүртэл өндөрт шууж, өвсийг хадаж, бусад илүү зүйлийг зайлуулна. Гадны хүн харуулын цэгт ойртохыг хориглосон хил хязгаарыг өдөр, шөнө болон хязгаартай харагдах нөхцөлд цагийн манаач болон бусад хүмүүст сайн харагдахаар тэмдэглэнэ: **“Цэг №2-ын хил”**

4. Цэргийн хотхоноос гадна орших чухал байгууламж /цэг/ болон харуулын байрыг хамгаалахын тулд цэг /харуулын байр/-ийн дөхөц газарт нуувчийг төхөөрөмжилж, буудлага явуулах нөхцлийг бүрдүүлнэ.

5. Харуулын цэг болон хамгаалж байгаа байгууламж /цэг/-ийн дөхөц газрыг шөнийн цагт гэрэлтүүлэх бөгөөд гэрлийг тавихдаа цагийн манаач зогсох цэг дээр буюу цэгүүдээр явах үед сүүдэрт байхаар тааруулна.

6. Цагийн манаач нь харуулын дарга, түүний туслагч буюу манаа халагчийг 2-оос цөөнгүй цэгээс дуудах бололцоотой хоёр талын холбоо, дохиоллын хэрэгслээр харуулын цэгийг төхөөрөмжилнө.

7. Хамгаалж байгаа агуулах, хадгалах байрны цэг бүрт гал унтраах багаж хэрэгсэл байна.

8. Харуулын цэгийн сүүдрэвчид хувцасны өлгүүр байна. Харуулын цэгийн сүүдрэвчийг хамгаалж байгаа байгууламж /цэг/ болон тухайн газартай адил өнгөөр будна.

9. Буудлагын зэвсэг, галт хэрэглэл бүхий агуулах /хадгалах байр/-ыг дохиоллын хэрэгслээр төхөөрөмжилж, дохиоллын гаралтын төхөөрөмжийг харуулын даргын өрөөнд байрлуулна.

